

**TEKS PERUTUSAN KHAS**  
**HARI RAYA AIDILFITRI 1444H/ 2023M**  
**TUAN YANG TERUTAMA YANG DI-PERTUA NEGERI SABAH**

---

**“RAMADAN PENUH RAHMAH,**

**SYAWAL KEMUNCAK TAKWA”**

***Allahu Akbar, Allahu Akbar, Allahu Akbar, Walilla Hilhamd.***

**Bismillahir      Rahmanir      Rahim,      Assalamu’alaikum**

**Warahmatullahi Ta’ala Wabarakatuh.**

1. Mengawali kalam, saya merafakkan segala puji dan syukur ke hadrat Allah SWT kerana dengan limpah kurnia dan izinNya, kita telah berjaya melaksanakan ibadah fardu puasa pada Ramadan tahun ini. Selawat beriring salam juga kita ucapkan ke atas

junjungan besar Nabi Muhammad SAW berserta keluarga dan para sahabat baginda.

2. Dengan iringan doa, semoga segala amal ibadah yang telah kita kerjakan pada bulan Ramadan al-Mubarak yang baharu sahaja berlalu pergi itu, mendapat keredaan, diterima dan diganjari pahala oleh Allah SWT yang berkekalan di dunia dan di akhirat. Aamin Ya Rabbal 'Alamin.

Kaum Muslimin Yang Dikasihi Allah SWT,

3. Mulai malam tadi sehingga imam mengangkat takbiratul ihram bagi mendirikan solat Hari Raya, kita disunatkan memperbanyakkan takbir. Demikianlah indahnya urutan ibadat yang telah disyariatkan oleh Allah SWT. Kita mula memenuhi tuntutan berpuasa, diikuti sembahyang sunat Tarawih, bertadarus

al-Quran dan Qiamullail. Dalam jangka waktu sebulan penuh, kita sebenarnya diuji sama ada mampu ataupun tidak untuk bersabar memenuhi perintah Allah dengan berpuasa.

***Allahu Akbar, Allahu Akbar, Allahu Akbar, Walilla Hilhamd.***

4. Kefarduan puasa di bulan Ramadan yang baharu sahaja dilalui adalah “*terapi ketuhanan*” untuk kesihatan dan pemakanan. Kesihatan merupakan faktor yang paling penting untuk semua. Jika badan sihat, semua kerja boleh dibuat dengan baik, sebaliknya jika tidak sihat, maka segala aktiviti tidak akan dapat dilakukan dengan sempurna. Inilah rahsia atau harga kesihatan. Malahan agama Islam sangat mementingkan kesihatan.
5. Al-Quran dan Hadis Nabi SAW sendiri ada menjelaskan tentang isu pemakanan. Al-Quran mengungkap:

**Bahawa makan minum itu boleh sahaja, tetapi jangan sampai berlebih-lebihan.**

Sementara hadis Nabi SAW pula ada menyebutkan tentang sukatan:

**Satu pertiga untuk makanan, satu pertiga lagi untuk minuman dan satu pertiga pula untuk bernafas.** Inilah kaedah pemakanan bagi kesihatan. Sebagai pengikut Islam dan umat Nabi Muhammad SAW, kita dituntut untuk memakai kaedah ini sebagai pelengkap pelaksanaan ibadah berpuasa.

**Allahu Akbar, Allahu Akbar, Allahu Akbar, Walilla Hilhamd.**

6. Kita sudahpun melangkah 1 Syawal 1444 Hijriyah. Saya ingin menyeru kepada saudara saudari di luar sana, marilah kita terus berazam untuk meningkatkan keimanan dan ketakwaan kepada Allah SWT. Segala suruhan dan laranganNya kita taati dan patuhi agar sifat takwa kekal mekar segar menerbitkan rasa kehambaan

dan cinta mendalam terhadap al-Khaliq bagi mengecap kemanisan iman yang sebenar.

7. Mari kita merafakkan setinggi-tinggi kesyukuran ke hadrat illahi Rabbi kerana berkesempatan sekali lagi menyambut dan merayakan Aidilfitri yang penuh makna ini. Rasa kesyukuran ini kita zahirkan melalui penganjuran majlis rumah terbuka dan melakukan amalan ziarah menziarahi sambil saling maaf bermaafan antara saudara-mara, jiran tetangga dan sahabat-handai. Amalan serupa ini yang sudah menjadi tradisi dalam masyarakat kita perlu dipelihara dan disuburkan bagi mempereratkan tali silaturahim sekaligus memperkuatkan ukhuwah Islamiah. Dalam sebuah hadis yang diriwayatkan oleh At-Tabrani, Rasulullah SAW bersabda yang bermaksud:

***“Barangsiapa senang untuk dipanjangkan umurnya dan diluaskan rezekinya serta dihindarkan dari kematian yang buruk, maka hendaklah ia bertakwa kepada Allah dan***

*menyambung silaturahim.”*

**Allahu Akbar, Allahu Akbar, Allahu Akbar, Walilla Hilhamd.**

8. Kita semua menyedari bahawa masyarakat kita terdiri daripada pelbagai kaum, anutan kepercayaan dan budaya. Hakikat ini menuntut kita semua supaya mengukuhkan perpaduan dengan memupuk perasaan hormat-menghormati dan kesederhanaan dalam menjalani kehidupan. Tujuannya tidak lain, untuk memelihara keamanan dan keharmonian hubungan antara kaum yang kita warisi sejak dulu lagi.
9. Segala perbezaan pendapat mengenai pelbagai isu tidak harus dijadikan alasan untuk mengendurkan hubungan dan meretakkan perpaduan masyarakat. Segala tembok pemisah mahupun perbezaan yang ada, harus dilihat sebagai kekuatan dalam menghormati kepelbagaian yang wujud dalam kerangka

merai persamaan yang menyempitkan jurang pemisah. Ingatlah bahawa semangat bersatu padu di kalangan masyarakat majmuk menjadi teras terpenting dalam memastikan perpaduan rakyat berada pada tahap tertinggi dan lestari.

10. Saudara Saudari yang dihormati, apabila berlakunya perpecahan ummah, maka ia menjadi petaka bagi umat Islam. Justeru, segala risiko yang boleh membawa kepada perpecahan perlu ditangani sebaik-baiknya di semua peringkat sama ada di peringkat individu sehingga kepada pemimpin masyarakat serta pihak berkuasa.

***Allahu Akbar, Allahu Akbar, Allahu Akbar, Walilla Hilhamd.***

11. Allah SWT memberikan pelbagai nikmat kepada manusia yang sangat berharga dan bernilai. Sebagai umat Islam, kita wajib bersyukur dan mengakui nikmat yang diberikan. Jika tidak, maka

rugilah kita dan hati tidak akan dapat merasai ketenangan. Hendaklah kita manfaatkan hari dan bulan yang mulia ini untuk melakukan amal kebajikan dengan menyantuni golongan yang kurang bernasib baik dalam masyarakat kita seperti golongan fakir miskin, anak-anak yatim, mangsa-mangsa musibah dan sebagainya. Ingatlah, dalam rezeki kita ada rezeki orang lain, maka ringankanlah tangan untuk berinfak, bersedekah dan menghulurkan apa jua jenis bantuan yang terdaya bagi menceriakan kehidupan mereka yang serba kekurangan di hari-hari kebesaran seperti Hari Raya Aidilfitri ini.

12. Seterusnya, saya ingin mengambil kesempatan ini untuk mengingatkan rakyat sekalian supaya jangan alpa terhadap aspek keselamatan dan kesihatan semasa merayakan Aidilfitri. Aspek ini perlu diberikan perhatian dan diambil berat yang sewajarnya sama ada di dalam rumah mahupun di luar rumah. Apa jua perbuatan atau perkara yang berpotensi mengundang musibah hendaklah

dihindari. Ini termasuklah ketika berada di jalan raya yang merupakan antara lokasi sering berlakunya kemalangan. Berhati-hati dan berhemahlah semasa memandu di jalan raya dengan mematuhi peraturan dan undang-undang yang telah dikuatkuaskan.

13. Di hari lebaran yang mulia ini, kita juga menghargai jasa dan pengorbanan pihak pasukan beruniform atas pengorbanan mereka yang sentiasa bersiap siaga memelihara keselamatan dan kemaslahatan rakyat. Marilah kita bersama-sama merafakkan doa memohon ke hadrat Allah SWT agar mereka sentiasa berada dalam naungan rahmat dan hidayahNya sepanjang menjalankan tugas dan kewajipan membela agama, bangsa dan negara.

***Allahu Akbar, Allahu Akbar, Allahu Akbar, Walilla Hilhamd.***

14. Akhirul kalam, saya bagi pihak seluruh ahli keluarga ingin mengambil kesempatan untuk mengucapkan selamat Hari Raya Aidilfitri, maaf zahir dan batin kepada seluruh umat Islam khususnya dan rakyat amnya. Saya doakan agar Hari Raya Aidilfitri tahun ini lebih bermakna dan meriah lagi, seterusnya berupaya mengukuhkan lagi ukhuwah dan perpaduan masyarakat majmuk di negeri Sabah khasnya, dan Malaysia amnya.

***Wabillahi Taufik Wal Hidayah, Wassalamu 'alaikum  
Warahmatullahi Ta'ala Wa Barakatuh.***